

**BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINA KAKANJ
Općinsko vijeće**

Broj: 01/1-34-Z/19
Kakanj, 30.09.2019. godine

Z A P I S N I K

sa 34. redovne sjednice Općinskog vijeća održane 30.09.2019. godine (ponedjeljak) u velikoj sali za sastanke Općinskog vijeća sa početkom u 9:00 sati (sažetak zapisnika)

Nakon intoniranja himne Bosne i Hercegovine, 34. sjednicu Općinskog vijeća otvorio je Slaven Katičić, predsjedavajući Općinskog vijeća i pozdravio prisutne.

Predsjedavajući je zamolio da vijećnici i vijećnice prijave svoje prisustvo.

Vijećnici i vijećnice prisutni na sjednici:

Džemal Bečirhodžić, Mejrema Purišević, Adnan Ibrahimspahić, Izudin Hrusto, Safet Šahman, Nadina Kovač, Edin Aliefendić, Amar Selimović, Senad Alajbegović, Namir Talić i Muahamed Kubat (naknadno pristupio) **(SDA)**

Mugdin Gorak **(SBB BiH)**

Rešad Merdić, Fahrudin Buza, Adisa Škulj, Zerina Kovač i Mirsad Tursum (naknadno pristupio) **(S BiH)**

Ahmed Begić, Eldin Mijoč i Enes Piljug **(SDP BiH)**

Slaven Katičić i Ivica Petrović **(HDZ BiH)**

Elvedin Delić (naknadno pristupio) **(A-SDA)**

Nusret Muslić, Evelin Bitić, Mirnes Merdić i Rizah Haračić **(samostalni vijećnici)**

Mujo Fafulić **(nacionalna manjina)**

Odsutni vijećnici: Semir Mušija **(samostalni vijećnik)** i Jasmin Mušanović **(SBB BiH)**

Predsjedavajući je konstatovao da je na sjednici u momentu prijave prisutno 25 vijećnika i vijećnica, te da su se stekli svi potrebni uslovi za validan rad i odlučivanje Općinskog vijeća.

Pored vijećnika sjednici su prisustvovali:

Aldin Šljivo, općinski načelnik

Ferdo Mijač, sekretar Općinskog vijeća

Enver Kusić, sekretar organa uprave

Džihad Berbić, pomoćnik općinskog načelnika za finansije

Mirza Fazlić, pomoćnik općinskog načelnika za privredu, urbanizam i zaštitu okoline

Rešad Zaimović, pomoćnik općinskog načelnika za društvene djelatnosti, boračka pitanja, raseljena lica, izbjeglice i povratnike

Nurčo Kurtović, pomoćnik općinskog načelnika za imovinskopravne, geodetske poslove i katastar nekretnina

Bahrudin Arnaut, pomoćnik općinskog načelnika za opću upravu, radne i zajedničke poslove, lokalnu samoupravu i mjesne zajednice

Nurudin Hrusto, pomoćnik općinskog načelnika za civilnu zaštitu

Zijad Neimarlija, direktor Zavoda za planiranje i izgradnju općine Kakanj

Izviestioci, obrađivači, gosti:

Mirnes Bajtarević, direktor JP „Grijanje“ d.o.o. Kakanj
Haris Mujkić i Edita Čaušević, predstavnici instituta IPSA Sarajevo

Predstavnici medija:

| | | |
|--------------------|--------------|---------------|
| NTV IC Kakanj | „Naša riječ“ | „Kaportal“ |
| Radio Kakanj | „Kakanjlive“ | „Klix portal“ |
| „Kakanjske novine“ | „Kakanj-x“ | |

Kratka saopćenja o radu sjednice i prethodnim pitanjima. U pripremi 34. sjednice Općinskog vijeća, Kolegij je razmatrao:

a) Odgovor Zavoda za planiranje i izgradnju po Zaključku Kolegija broj: 01/1-33-K-232/19 od 05.08.2019. godine

Odgovor je Kolegij primio k znanju.

b) Paket inicijativa „Centra za podršku biznisu“ Kakanj

Kolegij je donio zaključak kojim se inicira sastanak općinskog načelnika, predsjedavajućeg Općinskog vijeća, predstavnika Centra i nadležnih službi u čijoj su nadležnosti predmetne inicijative kako bi se razmotrile mogućnosti realizacije istih.

Usvajanje zapisnika sa 33. sjednice Općinskog vijeća:

Predsjedavajući je zapisnik sa 33. sjednice Općinskog vijeća stavio na glasanje, te je isti usvojen jednoglasno sa 25 glasova za.

Komentari na dostavljene odgovore na vijećnička pitanja:

Rizah Haračić: se zahvalio službi za privredu i općinskom načelniku na brzom djelovanju po pitanju nabavke cijevi i iskopa kanala za uređenje mjesnog greblja u naselju Dumanac.

Enes Piljug: je rekao da je dobio odgovore na tri pitanja sa prethodnih sjednica. Prvi odgovor se odnosi na paljenje guma na gradskoj deponiji, gdje se kaže da JP „Vodokom“ nije nikome dozvolilo paljenje unutar zone gradske deponije, ali zbog velike površine na kojoj se deponija prostire, a pri tome nije ograđena, dešava se da treća lica neovlašteno ulaze u krug deponije i olažu razne materijale ili iste spaljuju. Zbog toga je tražio ažurnije djelovanje radnika na obezbjeđenju deponije u situacijama kad uoče prisustvo trećih lica. Na pitanje kada će se početi odvoziti smeće iz Mramora i Subotinja, dobio je odgovor od JP „Vodokom“ u kome se kaže da JP nije tehnički spremno za proširivanje mreže odvoza otpada, zbog nedostatka odgovarajućih vozila. Zbog toga je predložio da se pokušaju iznaći mogućnosti da se pomogne JP da izvrši nabavku potrebne mehanizacije, kako bi se nivo ekološke zaštite stanovništva podigao na veći nivo. Treći odgovor je dobio od RMU „Kakanj“ na pitanje u vezi prašine i buke u naselju Karaulsko polje, ali kako nije dobio konkretan odgovor na ono što je tražio, rekao je da će ponovno dodatno konkretizovati pitanje prema Rudniku.

Edin Aliefendić: je rekao da se zahvaljuje Zavodu na realizaciji posla koji se odnosi na potkresivanje rastinja u ulici Branilaca, čime je povećana preglednost raskrsnica pri uključenju na predmetnu ulicu, te je rekao je na pitanje u vezi sigurnosti mosta u ulici Omera Maslića dobio odgovor nadležne službe u kojem se kaže da su za tražena ispitivanja potrebna veća finansijska sredstva, te da bilo kakva manja ulaganja u sanaciju mosta ne bi dala željeni efekat, zbog čega mu je sugerisano da u narednoj budžetskoj godini inicira da se u programe infrastrukturnih ulaganja uvrsti projekat sanacije ili izgradnje novog mosta na predmetnoj lokaciji, što je rekao da će i učiniti.

Komentari na dostavljena mišljenja na vijećničke inicijative:

Enes Piljug: je rekao da je dobio odgovor na inicijativu da se u ljetnom periodu vrši polijevanje ceste od Donjeg Kakanja do kamenoloma „Trgošped“, u kojem se kaže da je inicijativa prosljeđena nadležnom

upravitelju za održavanje cesta. Još je napomenuo da nikada nije realizovana njegova inicijativa za čišćenje i uklanjanje otpada sa obale rijeke Ribnice.

Nusret Muslić: je rekao da je imao dvije inicijative koje se odnose na most u Kraljevoj Sutjesci. Jedna je bila da se izvrši zamjena površinskog gazišta na mostu koji je od drvene građe, što je i učinjeno, dok je druga bila za rekonstrukciju ili izgradnju adekvatnog mosta na predmetnoj lokaciji. Obzirom da je u proteklom periodu na tu temu bilo nekih razgovora između Općine i nadležnog ministarstva, tražio je da se vijećnici pobliže informišu o ishodu razgovora.

Općinski načelnik (odgovor): se osvrnuo na prijedlog vijećnika Piljuga za pomoć JP „Vodokom“ pri nabavci novog vozila za odvoz komunalnog otpada, te je naglasio da je Općina spremna da sufinansira nabavku takvog vozila ukoliko JP pokrene adekvatnu inicijativa ili prijedlog po tom pitanju. Po pitanju sastanka sa ministrom za promet i komunikacije u vezi izgradnje mosta u Kraljevoj Sutjesci je rekao da je dogovoreno da se do kraja godine provede procedura izbora izvođača za izgradnju tog mosta, a da bi se tokom naredne godine isti trebao i sagraditi, te da će se konačno pitanje tog mosta kvalitetno riješiti.

Safet Šahman: je rekao nije zadovoljan odgovorom službe za privredu na inicijativu u vezi izgradnje novog kamenog nasipa u Podborju, koji je srušen prilikom zadnjeg velikog porasta rijeke Ribnice. U istom se navodi da će inicijativa biti prosljeđena Zavodu, zbog čega je tražio da službe međusobno ne prebacuju odgovornost jedni na druge, jer smatra da obično nakon takvog kolanja dokumentacije ne dođe do realizacije posla, nego je tražio da se u odgovoru jasno navede da li će i kada doći do realizacije podnesene inicijative. Još je rekao da nije dobio odgovor na inicijativu u vezi probnog odvoza smeća sa prostora Brnjica, gdje je tražio da JP „Vodokom“ sačini analizu rentabilnosti odvoza smeća sa tog područja općine, kako bi se utvrdilo da li je i u kojoj mjeri potrebno subvencioniranje odvoza komunalnog otpada sa prostora Brnjica. S tim u vezi se osvrnuo na prijedlog vijećnika Piljuga u vezi subvencije za nabavku vozila za potrebe JP „Vodokom“, te je naglasio da bi predmetno JP trebalo nastojati iz vlastitih sredstava izvršiti nabavku vozila, imajući u vidu činjenicu koliko je do sada izdvojeno budžetskih sredstava za funkcionisanje JP i JU.

Rizah Haračić: je rekao da je realizovana njegova inicijativa za iznalaženje novog polaznog mjesta za polaganje praktičnog dijela vozačkog ispita, čime je povećana sigurnost građana i vozača, te je sugerisao da se još provjeri stanje saobraćajne signalizacije i eventualna potreba za korigovanjem iste. Druga inicijativa se odnosila na proširivanje smještajnih kapaciteta u JU „Mladost“. Naglasio je da odgovor nije dobio od JU nego od službe za društvene djelatnosti u kojem se podržava njegova inicijativa, te je rekao da je neprihvatljivo da se onaj ko je zadužen za funkcionisanje ovog segmenta društvene zajednice ne očituje po inicijativi, a poznato je da dvostruko veći broj djece nije primljen u odnosu na broj djece koji je primljen u obdanište. Također, je istakao da je neprihvatljivo da UO JU „Mladost“ donese svoje kriterije za prijem djece u obdanište, a da pri tome ne primjenjuje kriterije donesene od strane Vijeća, pa je u tom smislu tražio od nadležne službe da od predmetne JU pribavi kriterije po kojima je vršen prijem djece u obdanište, te da isti budu javno objavljeni.

Vijećnička pitanja:

Safet Šahman: je postavio dva vijećnička pitanja. Prvo da li će se i kada izvršiti produbljanje ili čišćenje korita rijeke Ribnice na dionici koja je oštećena u poplavama 2014. godine, odnosno da li će se izvršiti sanacija te dionice puta i mosta i drugo pitanje zašto nije završen projekat vodosnadbijevanja MZ Krševac - Podružnice Hrastovac, odnosno ko je odgovoran za projektovanje i ugradnju neodgovarajuće pumpe.

Zijad Neimarlija (odgovor): je rekao da u općini ne postoji putarska služba koja bi obilazila teren i vršila sanaciju nastalih oštećenja na putu, ali da se po pozivu sa terena uvijek izađe na lice mjesta i izvrši potrebna sanacija.

Enes Piljug: je postavio dva vijećnička pitanja i to šta je navedeno u okolinskoj dozvoli izdatoj RMU „Kakanj“ od strane Federalnog ministarstva okoliša i turizma, da se prati/mjeri monitoringom, odnosno da li su to buka i prašina i koliko puta godišnje treba vršiti mjerenja, a radi se o postrojenju „Pretovarni sistem“ u naselju Karaulsko polje i drugo pitanje kakvo je stanje sa uzgojem malina na području općine

Kakanj, tačnije kolika je površina pod zasadima, koliki je općinski podsticaj za 2019. godinu i koja je perspektiva malinjaka na području općine Kakanj.

Rizah Haračić: je postavio pitanje šta se može uraditi na sankcionisanju vrijeđanja doktora i iznošenju netačnih informacija na društvenim mrežama (Facebook i drugo) od strane pojedinaca, ako se radi o neprovjerenim informacijama kojima se nanosi nemjerljiva šteta osobama prije utvrđivanja činjeničnog stanja.

Amar Selimović: je postavio dva vijećnička pitanja. Prvo zašto se ne izvrši popravak rasvjetnih tijela na mostu u Bilješevu i drugo u kojoj je fazi izrada Projekta izgradnje mosta u naseljenom mjestu Modrinje, za koji projekat su sredstva planirana u 2019. godini.

Zijad Neimarlija (odgovor): je rekao da je provedena procedura za izbor projektanta za izgradnju mosta u Modrinju i isti bi trebao biti gotov do kraja godine, a što se tiče popravka rasvjete na mostu u Bilješevu je rekao da je ista u više navrata popravljana i to ne samo zamjena rasvjetnih tijela, nego kompletna instalacija i sve ostalo što je bilo oštećeno i da su za to izdvojena nemala sredstva. Međutim, dešava se da nakon izvršene popravke ponovo dolazi do oštećenja i devastacije istih, pa je s toga predložio da se ispred Savjeta MZ preduzmu mjere da se takve stvari ne ponavljaju, obzirom da je nemoguće stalno izdvajati sredstva za iste stvari.

Vijećničke inicijative:

Safet Šahman: je podnio inicijativu da se prilikom objave tendera ili nekih drugih radnji u vezi provođenja tenderske procedure informišu vijećnici od strane nadležne općinske službe na sjednicama Vijeća, a naročito o uspješno ili neuspješno završenoj tenderskoj proceduri.

Rizah Haračić: je podnio dvije vijećničke inicijative. Prva je za utvrđivanje javnog interesa na trasi koja je predviđena za realizaciju projekta kanalizacije MZ Bićer, u cilju pribavljanja urbanističke saglasnosti koja se ne može dobiti bez saglasnosti svih vlasnika parcela, a za nekoliko parcela to nije moguće zbog smrti vlasnika ili nemogućnosti kontaktiranja pojedinih vlasnika. Druga inicijativa je da se izvrši snimanje terena u MZ Bićer i to u ulici Almira Hasagića, a radi razmatranja mogućnosti izgradnje dječijeg igrališta kojeg nema na teritoriji ove mjesne zajednice.

Slaven Katičić: je podnio vijećničku inicijativu da se preispita model finansiranja JU za predškolski odgoj i obrazovanje „Mladost“ Kakanj, koji se odnosi na cijenu i način prijema djece u vrtić, uključujući visinu općinske subvencije i odnos iste prema drugim subvencijama i pomoći djeci studentima i đacima.

Predsjedavajući je konstatovao da su vijećnici Edin Aliefendić, Namir Talić i Amar Selimović podnijeli vijećničke inicijative bez korištenja govornice.

Edin Aliefendić: je podnio dvije vijećničke inicijative, prva je za uređenje parking površine smještene u ulici 7. Muslimanska brigade, između zgrada na broju 7. i 9. iz razloga što je na navedenom parkingu trenutno zemljana površina što stvara blato. Druga inicijativa je da se u programima za izgradnju infrastrukturnih objekata za 2020. godinu, planiraju sredstva za rekonstrukciju odnosno izgradnju novog mosta na rijeci Zgošći u ulici Omera Maslića kod stambeno-poslovne zgrade „Trgošped“ (bivša pilana).

Namir Talić: je podnio dvije vijećničke inicijative. Prva je da se trajno i kvalitetno uredi korito Bilivojskog potoka, kako bi se spriječile štete na glavnom putu, privatnim posjedima, te džamiji u Brnju, što se redovno dešava u periodu jeseni, zime i proljeća kad usljed naglih bujica dolazi do izlivanja Bilivojskog potoka koji direktno ugrožava glavni put Brnj-Kakanj i druge javne i privatne objekte. Druga je da se hitno izdvoje sredstva za asfaltiranje glavnog puta Brnj-Kakanj i to na dionici od kamenoloma do raskrsnice puta za Bijele Vode, jer je na ovom dijelu puta došlo je do ulegnuća ceste, gdje se zadržava voda i otežava prolazak pješaka i vozila.

Amar Selimović: je podnio dvije vijećničke inicijative. Prva je za obnavljanje stavke u Budžetu Općine Kakanj za 2019. godinu, koja se odnosi na sufinansiranje doktorskih studija osobama nastanjenim na području općine Kakanj, a ukoliko sredstva za inicijativu nije moguće obezbjediti u tekućoj budžetskoj godini rebalansom Budžeta, predložio je da se isto uvrsti u Budžet za 2020. godinu. Druga je da se

pokrenu potrebne aktivnosti prema JP „Željeznice FBiH“ da se izvrši popravka zvučne i svjetlosne signalizacije i rampe na pružnom prelazu u naseljenom mjestu Bilješevo-Podgora.

Utvrđivanje dnevnog reda:

Predsjedavajući je napomenuo da je prijedlog dnevnog reda usaglašen na sjednici Kolegija koja je održana 19.09.2019. godine, pa je predložio dnevni red po pozivu za 34. sjednicu.

Rešad Zaimović: je predložio da se tačka 12. predloženog dnevnog reda „Prijedlog odluke o ostvarivanju prava na troškove prevoza radi liječenja u drugom kantonu“, skine sa dnevnog reda kako bi se materijal dodatno doradio, te će ista biti na dnevnom redu za neku od narednih sjednica.

Nurčo Kurtović: je predložio da se u dnevni red uvrsti tačka „Prijedlog odluke o davanju saglasnosti za potpisivanje ugovora o uspostavi prava služnosti“.

Predsjedavajući je dao pauzu od 10 minuta.

Nakon pauze predsjedavajući je predložio da se prihvate prijedlozi pomoćnika načelnika, te da se skine sa predloženog dnevnog reda tačka 12. „Prijedlog odluke o ostvarivanju prava na troškove prevoza radi liječenja u drugom kantonu“, a da se na njeno mjesto uvrsti tačka „Prijedlog odluke o davanju saglasnosti za potpisivanje ugovora o uspostavi prava služnosti“.

U raspravi po predloženom dnevnom redu nije niko učestvovao, te je Vijeće jednoglasno sa 27 glasova za, usvojilo dnevni red za 34. sjednicu.

Usvojeni dnevni red:

1. Prijedlog odluke o pristupanju izradi izmjene i dopune Prostornog plana općine Kakanj 2010-2030.
2. Nacrt odluke o izmjenama i dopunama Regulacionog plana „Kakanj“
3. Nacrt odluke o provođenju Regulacionog plana „Kakanj“
4. Izveštaj o izvršenju Budžeta Općine Kakanj za period 01.01-30.06.2019. godine
5. Izveštaj o izvršenju tekuće budžetske rezerve Budžeta Općine Kakanj za period 01.01-30.06.2019. godine
6. Prijedlog odluke o gubljenju statusa javnog dobra
7. Prijedlog odluke o načinu i uslovima raspolaganja nekretninama – javne prodaje neizgrađenog građevinskog zemljišta u Kaknju
8. Prijedlog rješenja o imenovanju Komisije za provođenje javnog nadmetanja – licitacije neizgrađenog građevinskog zemljišta u Kaknju
9. Prijedlog odluke o načinu i uslovima raspolaganja nekretninom – prodaji neposrednom pogodbom neizgrađenog građevinskog zemljišta u Bjelavićima
10. Prijedlog odluke o nabavci nekretnine – skloništa/azila za pse u neselju Bare, općina Kakanj
11. Prijedlog odluke o izmjeni Odluke o davanju na korištenje stambenih jedinica izgrađenih na osnovu Projekta „Stambeno zbrinjavanje Roma 2017-2018. u općini Kakanj“
12. Prijedlog odluke o davanju saglasnosti za potpisivanje ugovora o uspostavi prava služnosti
13. Prijedlog odluke o usvajanju Izveštaja Komisije za provođenje izbora u MZ Bištrani, Gornja Ričica, Kučići i Plandište
14. Prijedlog odluke o potvrđivanju rezultata izbora i dodjela mandata za članove savjeta MZ Bištrani, Gornja Ričica, Kučići i Plandište
15. Prijedlog odluke o osnivanju MZ Koprivnica sa prijedlogom zaključka o davanju ovlaštenja Komisiji za provođenje izbora u MZ Bištrani, Gornja Ričica, Kučići i Plandište za provođenje izbora i u MZ Koprivnica

Tačka 1.

Prijedlog odluke o pristupanju izradi izmjene i dopune Prostornog plana općine Kakanj 2010-2030.

Predlagač: Općinski načelnik
Obrađivač: Služba za privredu, urbanizam i zaštitu okoline
Izjavitelj: Mirza Fazlić, pomoćnik općinskog načelnika
Stav i mišljenje: Komisija za Statut i propise

U diskusiji nije niko učestvovao i Vijeće je sa 25 glasova za, bez glasova protiv i 1 glas uzdržan usvojilo Odluku o pristupanju izradi izmjene i dopune Prostornog plana općine Kakanj 2010-2030.

Tačka 2.

Nacrt odluke o izmjenama i dopunama Regulacionog plana „Kakanj“

Predlagač: Općinski načelnik
Obrađivač: Služba za privredu, urbanizam i zaštitu okoline
Izjavitelj: Mirza Fazlić, pomoćnik općinskog načelnika i Edita Čaušević, predstavnik IPSA instituta
Stav i mišljenje: Komisija za Statut i propise

U diskusiji nije niko učestvovao i Vijeće je sa 25 glasova za, bez glasova protiv i 2 glasa uzdržan usvojilo Zaključak o utvrđivanju Nacrta Odluke o izmjenama i dopunama Regulacionog plana „Kakanj“.

Tačka 3.

Nacrt odluke o provođenju Regulacionog plana „Kakanj“

Predlagač: Općinski načelnik
Obrađivač: Služba za privredu, urbanizam i zaštitu okoline
Izjavitelj: Mirza Fazlić, pomoćnik općinskog načelnika
Stav i mišljenje: Komisija za Statut i propise

U diskusiji nije niko učestvovao i Vijeće je sa 25 glasova za, bez glasova protiv i 2 glasa uzdržan usvojilo Zaključak o utvrđivanju Nacrta Odluke o provođenju Regulacionog plana „Kakanj“.

Tačka 4.

Izveštaj o izvršenju Budžeta Općine Kakanj za period 01.01-30.06.2019. godine

Predlagač: Općinski načelnik
Obrađivač: Služba za finansije
Izjavitelj: Džihad Berbić, pomoćnik općinskog načelnika
Stav i mišljenje: Komisija za Budžet i finansije

U diskusiji nije niko učestvovao i Vijeće je sa 23 glasa za, 2 glasa protiv i 1 glas uzdržan usvojilo Zaključak o prihvatanju Izveštaja o izvršenju Budžeta Općine Kakanj za period 01.01-30.06.2019. godine.

Tačka 5.

Izveštaj o izvršenju tekuće budžetske rezerve Budžeta Općine Kakanj za period 01.01-30.06.2019. godine

Predlagač: Općinski načelnik
Obrađivač: Služba za finansije
Izjavitelj: Džihad Berbić, pomoćnik općinskog načelnika
Stav i mišljenje: Komisija za Budžet i finansije

U diskusiji je učestvovao Enes Piljug.

Enes Piljug: je tražio pojašnjenje pojedinih pozicija iz Izveštaja. Rekao je da mu je nejasno za koje potrebe su data sredstva Elektroprivredi, zatim sredstva izdvojena za ugriz pasa, te po kom osnovu se dijele sredstva za potrebe liječenja, kao i zašto su dodjeljena sredstva Savezu udruženja boračkih organizacija Kakanj ako se zna da su Budžetom predviđena sredstva za rad tih udruženja.

Džihad Berbić (odgovor): je napomenuo da u skladu sa Zakonom o Budžetima sredstvima tekuće budžetske rezerve raspolaže općinski načelnik u skladu sa ukazanim potrebama, a za namjene koje nisu planirane ili su planirane u nedovoljnom iznosu u Budžetu. Sredstva isplaćena Elektroprivredi BiH se odnose na poslove izmještanja elektro kablova, a za potrebe nove zgrade socijalnog stanovanja koja je u izgradnji. Sredstva isplaćena za slučajeve ugriza pasa se isplaćuju po osnovu zaključenih vansudskih nagodbi za svaki pojedinačan slučaj, a nakon postupka koji provede općinsko pravobranilaštvo, dok se sredstva za potrebe liječenja isplaćuju pojedincima u skladu sa procjenom situacije i potreba.

Nakon diskusije Vijeće je sa 24 glasa za, bez glasova protiv i 2 glasa uzdržan usvojilo Zaključak o prihvatanju Izvještaja o izvršenju tekuće budžetske rezerve Budžeta Općine Kakanj za period 01.01-30.06.2019. godine.

Tačka 6.

Prijedlog odluke o gubljenju statusa javnog dobra

Predlagač: Općinski načelnik

Obrađivač: Služba za imovinskopravne, geodetske poslove i katastar nekretnina

Izvjestilac: Nurčo Kurtović, pomoćnik općinskog načelnika

Stav i mišljenje: Komisija za Statut i propise

U diskusiji nije niko učestvovao i Vijeće je sa 22 glasa za, bez glasova protiv i 4 glasa uzdržan usvojilo Odluku o gubljenju statusa javnog dobra.

Tačka 7.

Prijedlog odluke o načinu i uslovima raspolaganja nekretninama – javne prodaje neizgrađenog građevinskog zemljišta u Kaknju

Predlagač: Općinski načelnik

Obrađivač: Služba za imovinskopravne, geodetske poslove i katastar nekretnina

Izvjestilac: Nurčo Kurtović, pomoćnik općinskog načelnika

Stav i mišljenje: Komisija za Statut i propise

U diskusiji nije niko učestvovao i Vijeće je sa 25 glasa za, bez glasova protiv i 1 glas uzdržan usvojilo Odluku o načinu i uslovima raspolaganja nekretninama – javne prodaje neizgrađenog građevinskog zemljišta u Kaknju.

Tačka 8.

Prijedlog rješenja o imenovanju Komisije za provođenje javnog nadmetanja – licitacije neizgrađenog građevinskog zemljišta u Kaknju

Predlagač: Komisija za izbor i imenovanje

Obrađivač: Služba za imovinskopravne, geodetske poslove i katastar nekretnina

Izvjestilac: Edin Aliefendić, predsjednik Komisije

Edin Aliefendić: je ispred Komisije za izbor i imenovanje predložio sastav Komisije: predsjednik, Sadan Sikira, članovi, Hajrudin Zekić, Ivica Petrović, Vinka Aletović, Sedin Kokić, Almir Gluhić, Ilhana Alajbegović i Mirnes Merdić.

U diskusiji je učestvovala Melisa Amidić, ispred Službe za imovinsko pravne, geodetske poslove i katastar nekretnina.

Melisa Amidić: je napomenula da Pravilnik o postupku javnog konkursa za raspolaganje nekretninama u vlasništvu Federacije BiH, kantona, općina i gradova, kojim je propisan način imenovanja komisija, propisuje da komisija ima predsjednika i dva člana, a da svaki od njih ima zamjenika.

Predsjedavajući je na prijedlog predsjednika Komisije za izbor i imenovanje dao pauzu od 5 minuta.

Edin Aliefendić: je predložio Komisiju u sastavu: predsjednik, Sadan Sikira, članovi, Hajrudin Zekić i Ivica Petrović, zamjenik predsjednika Sedin Kokić, zamjenski članovi Ilhana Alajbegović i Almir Gluhić.

Nakon diskusije Vijeće je sa 23 glasa za, 2 glasa protiv, bez glasova uzdržan usvojilo Rješenje o imenovanju Komisije za provođenje javnog nadmetanja-licitacije neizgrađenog građevinskog zemljišta u Kaknju u sastavu: Sadan Sikira – predsjednik, Hajrudin Zekić i Ivica Petrović – članovi, zamjenik predsjednika Sedin Kokić, zamjenski članovi Ilhana Alajbegović i Almir Gluhić.

Tačka 9.

Prijedlog odluke o načinu i uslovima raspolaganja nekretninom-prodaji neposrednom pogodbom neizgrađenog građevinskog zemljišta u Bjelavićima

Predlagač: Općinski načelnik

Obrađivač: Služba za imovinskopravne, geodetske poslove i katastar nekretnina

Izjavitelj: Nurčo Kurtović, pomoćnik općinskog načelnika

Stav i mišljenje: Komisija za Statut i propise

U diskusiji nije niko učestvovao i Vijeće je sa 24 glasa za, bez glasova protiv i uzdržan usvojilo Odluku o načinu i uslovima raspolaganja nekretninom-prodaji neposrednom pogodbom neizgrađenog građevinskog zemljišta u Bjelavićima.

Tačka 10.

Prijedlog odluke o nabavci nekretnine – skloništa/azila za pse u neselju Bare, općina Kakanj

Predlagač: Općinski načelnik

Obrađivač: Služba za imovinskopravne, geodetske poslove i katastar nekretnina

Izjavitelj: Nurčo Kurtović, pomoćnik općinskog načelnika

Stav i mišljenje: Komisija za Statut i propise, Komisija za mlade, Komisija za ljudska prava i ravnopravnost spolova

U diskusiji su učestvovali: Evelin Bitić, Slaven Katičić i Rizah Haračić.

Evelin Bitić: je postavio pitanje neophodnosti azila za pse u Kaknju, te je napomenuo za problem dovoza pasa lotalica u Kakanj iz drugih općina u okruženju. Također, pitao je za procjenu koštanja izgradnje tog azila, kao i pitanje oko kapaciteta azila, naglašavajući da na području općine postoji višestruko veći broj pasa lotalica od pretpostavljenog kapaciteta istog.

Slaven Katičić: je ponovio problem dovoza pasa lotalica sa područja drugih općina, te pozvao na doradu postojeće odluke koja propisuje uslove i način držanja pasa sa posebnim akcentom na kaznene odredbe. Rekao je da smatra da bi trebalo provoditi intenzivnu kampanju sa ciljem sterilizacije pasa i naglasio da je ovo prvi korak ka rješavanju predmetnog problema. Pozvao je na usvajanje odluke i rekao da nakon ovoga treba donijeti niz provedbenih odluka kako bi se problem pasa lotalica do kraja riješio.

Rizah Haračić: je rekao da ne vidi zašto se problematizira stvar oko donošenja odluke o određivanju lokacije za gradnju azila za pse. Rekao je da se u ovoj fazi samo određuje lokacija za buduću eventualnu gradnju objekta, te da je razumljivo da u ovom trenutku nije moguće reći iznos koštanja ovog projekta. U svakom slučaju pozvao je na usvajanje predmetne odluke i napomenuo da se često puta na Vijeću vodila diskusija oko rješavanja ovog problema, te da ni u kom slučaju sada ne bi trebali odustati od započetog posla.

Zijad Neimarlija: je naglasio da je izgradnja azila zakonska obaveza općine. Prvi korak u ispunjenju te obaveze je dodjela općinskog zemljišta za izgradnju objekta. Procjena koštanja građevinskih radova, bez opreme objekta je oko 350 hiljada KM, a procjenjeni kapaciteti su oko 50 pasa. Nakon ove faze slijedi faza gradnje objekta i dodjele istog na upravljanje, a o svemu tome će odluku donositi Vijeće.

Općinski načelnik: je ponovio da je izgradnja azila zakonska obaveza, kao i da je problem pasa lotalica evidentan. Napomenuo je da je Vijeće prije dvije godine donijelo odluku da JP „Vodokom“ izradi projekat i izgradi objekat azila za pse, te da nakon toga i vodi brigu o svemu vezanom za problem pasa lotalica.

Sada su intezivirane aktivnosti na tom planu, a do konačne realizacije ovog projekta sigurno neće doći ni u narednoj godini. Naglasio je da predmetni objekat neće biti sabirni centar za pse, već samo sklonište u kojem bi se isti zadržavali određeno kraće vrijeme dok se ne izvrši sterilizacija i liječenje u slučaju oboljenja, nakon čega bi se vraćali na ulicu ili eventualno udomljavali putem organizacija koje se bave zaštitom prava pasa, što je trend na zapadu.

Nakon diskusije Vijeće je sa 19 glasova za, bez glasova protiv i 4 glasa uzdržan usvojilo Odluku o nabavci nekretnine – skloništa/azila za pse u neselju Bare, općina Kakanj.

Tačka 11.

Prijedlog odluke o izmjeni Odluke o davanju na korištenje stambenih jedinica izgrađenih na osnovu Projekta „Stambeno zbrinjavanje Roma 2017-2018 u općini Kakanj“

Predlagač: Općinski načelnik

Obrađivač: Komisija za stambeno zbrinjavanje Roma

Izjavitelj: Međid Bajrić, predsjednik Komisije

U diskusiji nije niko učestvovao i Vijeće je sa 23 glasa za, bez glasova protiv i uzdržan usvojilo Odluku o izmjeni Odluke o davanju na korištenje stambenih jedinica izgrađenih na osnovu Projekta „Stambeno zbrinjavanje Roma 2017-2018 u općini Kakanj“.

Tačka 12.

Prijedlog odluke o davanju saglasnosti za potpisivanje ugovora o uspostavi prava služnosti

Predlagač: Općinski načelnik

Obrađivač: Služba za imovinskopravne, geodetske poslove i katastar nekretnina

Izjavitelj: Nurčo Kurtović, pomoćnik općinskog načelnika

U diskusiji su učestvovali Izudin Hrusto i Rešad Merdić.

Izudin Hrusto: je pitao kako je moguće da se uradi određeni projekat i dobiju potrebne dozvole za gradnju, a da se prethodno nisu pribavile saglasnosti nadležnih preduzeća za potrebne priključke. Rekao je da smatra da se to dešava iz razloga što se projektanti angažuju van Kakanja, te da urade projekat a da nisu ni izašli na lice mjesta. Zbog toga je apelovao da se prilikom izrade projekata u budućnosti angažuju isključivo domaći stručnjaci.

Nurčo Kurtović: je pojasnio da je u konkretnom slučaju projektom predviđen ovaj način rješavanja imovinsko pravnih odnosi radi priključka novosagrađene zgrade socijalnog stanovanja na infrastrukturu. Nije mu poznato ko je vršio projektovanje objekta, ali je činjenica da je objekat sagrađen i da sada ne postoje druge mogućnosti da se infrastruktura priključi, a radi se i o hitnosti kako bi se stanovi dodjelili budućim korisnicima.

Rešad Merdić: se složio sa diskusijom vijećnika Hruste i naglasio da se sada stvaraju dodatni troškovi, a ustvari sva pitanja u vezi priključaka zgrade na infrastrukturu su trebala biti riješena prije gradnje objekta, odnosno u fazi pribavljanja urbanističke i građevinske dozvole.

Općinski načelnik: je rekao da se u ovaj projekat krenulo 2018. godine, te da treba imati u vidu da se radi o socijalnom projektu, gdje su od strane nadležnog ministarstva dati kratki rokovi za iznalaženje lokacije za gradnju objekta. Poslu se pristupilo bez detaljnog ispitivanja svih detalja, a sve s ciljem da se što prije realizuju sredstva odobrena od strane ministarstva. Zbog svega navedenog neophodno je sada riješiti stvari oko priključka izgrađene zgrade na komunalnu infrastrukturu.

Nakon diskusije Vijeće je sa 23 glasa za, bez glasova protiv i uzdržan usvojilo Odluku o davanju saglasnosti za potpisivanje ugovora o uspostavi prava služnosti.

Predsjedavajući je predložio da se vodi objedinjena rasprava po tačkama 13. i 14. dnevnog reda, a da se glasanje obavi pojedinačno.

Tačka 13.

Prijedlog odluke o usvajanju Izvještaja Komisije za provođenje izbora u MZ Bištrani, Gornja Ričica, Kučići i Plandište

Predlagač: Općinski načelnik

Obrađivač: Služba za opću upravu, radne i zajedničke poslove, lokalnu samoupravu i mjesne zajednice

Izjavitelj: Bahrudin Arnaut, pomoćnik općinskog načelnika

Tačka 14.

Prijedlog odluke o potvrđivanju rezultata izbora i dodjeli mandata za članove savjeta MZ Bištrani, Gornja Ričica, Kučići i Plandište

Predlagač: Općinski načelnik

Obrađivač: Služba za opću upravu, radne i zajedničke poslove, lokalnu samoupravu i mjesne zajednice

Izjavitelj: Bahrudin Arnaut, pomoćnik općinskog načelnika

U diskusiji nije niko učestvovao i Vijeće je jednoglasno sa 23 glasa za usvojilo Odluku o usvajanju Izvještaja Komisije za provođenje izbora u MZ Bištrani, Gornja Ričica, Kučići i Plandište i Odluku o potvrđivanju rezultata izbora i dodjeli mandata za članove savjeta MZ Bištrani, Gornja Ričica, Kučići i Plandište.

Tačka 15.

Prijedlog odluke o osnivanju MZ Koprivnica sa prijedlogom zaključka o davanju ovlaštenja Komisiji za provođenje izbora u MZ Bištrani, Gornja Ričica, Kučići i Plandište za provođenje izbora i u MZ Koprivnica

Predlagač: Općinski načelnik

Obrađivač: Služba za opću upravu, radne i zajedničke poslove, lokalnu samoupravu i mjesne zajednice

Izjavitelj: Bahrudin Arnaut, pomoćnik općinskog načelnika

U diskusiji nije niko učestvovao i Vijeće je jednoglasno sa 23 glasa za usvojilo Odluku o osnivanju MZ Koprivnica i Zaključak o davanju ovlaštenja Komisiji za provođenje izbora u mjesnim zajednicama Bištrani, Gornja Ričica, Kučići i Plandište za provođenje izbora za članove Savjeta MZ Koprivnica.

Predsjedavajući je zaključio rad 34. sjednice Općinskog vijeća u 12:20.

Audiozapis sa sjednice Vijeća pohranjen je u elektronskoj formi (CD-u) i sastavni je dio ovog Zapisnika.

**SEKRETAR
OPĆINSKOG VIJEĆA**
Ferdo Mijač

**PREDSJEDAVAJUĆI
OPĆINSKOG VIJEĆA**
Slaven Katičić